

15/04/2001

Mengapa tempua bersarang rendah?

SAYA rapat juga dengan Anwar Ibrahim. Gandingan Anwar-Mahathir amat menyenangkan. Semasa menjadi Setiausaha Politik Perdana Menteri, seringlah saya berulang-alik antara Pejabat Perdana Menteri dan Pejabat Timbalan Perdana Menteri. Waktu itu Anwar adalah harapan masa depan kita. Harapan sebahagian besar rakyat, terutama orang Melayu.

Maka hingga seminggu sebelum peristiwa pemecatan Anwar - sebagai orang kecil tanpa apa-apa jawatan lagi - saya masih mencuba mengelakkan agar peristiwa yang menyayat hati ini tidak berlaku. Saya tidak tahu apakah sebenarnya yang terjadi antara dua pemimpin yang saya kagumi ini. Tiga empat bulan sebelum itu pun, saya sering mengingatkan Anwar supaya berhati-hati. Jangan tersalah langkah. Musuh akan mengorak langkah.

Pada malam Anwar ditangkap, saya dan beberapa orang kawan - semuanya tidak ada apa-apa kepentingan politik diri - tidak boleh tidur sampai ke pagi. Bala politik telah tiba!

Sekarang harapan kita itu hancur berkecai. Bagai kaca terhempas ke batu. Dan kaki kita sedang berdarah kerana tidak dapat mengelak daripada memijak-mijak pecahan kaca itu di mana-mana. Akibatnya kita mengalami kemelut dan badai politik yang amat serius dan berpanjangan.

Kita jadi amat kesal dan marah-marah. Kita tenggelam punca dan kehilangan arah perjuangan, Dr. Mahathir berusaha keras melawan badai itu dan memantapkan kembali arah perjuangan kita. Namun belum juga berhasil. Dan nampaknya ada di antara kita yang senang sekali jika kemelut dan badai ini berterusan.

Ketika berjalan-jalan di seluruh tanah air, hati saya sering berbisik: "Alangkah baiknya jika Anwar dapat meneruskan harapan kita, menggantikan Dr. Mahathir. Hampir semua prasarana sosial dan ekonomi telah disediakan oleh Dr. Mahathir. Dari bandar hingga ke desa."

Fikiran saya ngelamun lagi: "Jika Anwar dapat menjaga dan memperbaiki yang sudah ada ini pun, sudah lebih daripada cukup. Kita akan menikmati kehidupan yang cukup sempurna. Keutuhan kita akan terjamin."

Hati saya bertanya: "Apakah agaknya hikmah Allah menjadikan kita begini?" Bukankah setiap yang dijadikan Allah ada hikmahnya. Cuma manusia yang tidak pandai menggunakannya.